

**FRÁSÖGN**

*af fundi forsætisnefndar í Kaupmannahöfn 24. mars 2015 og fundi nefndar ráðsins um sameiginlega vestnorræna stefnu á norðurslóðum í Kaupmannahöfn 25. mars 2015*

Forsætisnefnd Vestnorræna ráðsins fundaði í Kaupmannahöfn 24. mars 2015. Af hálfu Íslandsdeildar Vestnorræna ráðsins sótti fundinn Unnur Brá Konráðsdóttir, formaður, auk Vilborgar Ásu Guðjónsdóttur ritara. Helstu mál á dagskrá voru umræður um fund með Evrópuþinginu í Brussel tveimur dögum síðar, ársfund ráðsins og hátíðahöld í tengslum við 30 ára afmæli þess í Rúnavík í Færeyjum 10–14. ágúst nk., umsókn ráðsins um áheyrnaraðild að Norðurskautsráðinu, umræður um fund nefndar ráðsins um hugsanlega sameiginlega vestnorræna stefnu á norðurslóðum daginn eftir, fundi þingmannanefndar um Hoyvíkursamninginn, fríverslunarsamning milli Íslands og Færeyja, þátttöku ráðsins í Arctic Circle-ráðstefnunni og beiðni til utanríkisráðherra landanna um að setja á fót vinnuhóp sem kortleggur möguleika og áskoranir við mögulegan vestnorrænan fríverslunarsamning.

Forsætisnefnd byrjaði á að ræða árlegan fund sinn með þingnefnd Evrópuþingsins sem áætlaður var tveimur dögum síðar. Helstu mál á dagskrá voru bann Evrópusambandsins við innflutningi á selaafurðum og samvinna á norðurslóðum. Ákveðið var að ráðið mundi á fundinum gagnrýna harðlega þær breytingar sem kynntar hafa verið á undanþágu Grænlandinga frá banni Evrópusambandsins við innflutningi á selaafurðum. Þá var ákveðið að kynna fyrir Evrópuþinginu vinnu ráðsins um málefni norðurslóða, þar á meðal vinnu nýrrar nefndar ráðsins um hugsanlega sameiginlega vestnorræna stefnu á norðurslóðum, umsókn um áheyrnaraðild að Norðurskautsráðinu og þátttöku í Arctic Circle-ráðstefnunni í Hörpu.

Framkvæmdastjóri ráðsins, Inga Dóra Markussen, kynnti drög að dagskrá ársfundar þess og hátíðahöldum í tilefni af 30 ára afmæli ráðsins í Rúnavík 10.–14. ágúst nk. Ákveðið var að bjóða forsætisráðherrum og forsetum þjóðþinga landanna þriggja, forseta Íslands, fyrrum framkvæmdastjórum ráðsins ásamt einum heiðursgesti og tveimur ungum stjórnámálamönnum frá hverju landi á afmælishátíðina.

Forsætisnefnd ræddi um umsókn ráðsins um áheyrnaraðild að Norðurskautsráðinu en búist er við svari frá Norðurskautsráðinu 14. maí nk. Ákveðið var að fylgja umsókninni eftir á næstu vikum. Þá var ákveðið að fundur nefndarinnar með Evrópuþinginu árið 2016 verði haldinn á Grænlandi.

Nefndin ræddi jafnframt þingmannanefnd um Hoyvíkursamninginn, en Grænland hefur óskað eftir að fundir nefndarinnar verði ekki hluti af dagskrá funda ráðsins og jafnframt að framkvæmdastjóri ráðsins sinni ekki verkefnum tengdum Hoyvíkursamningnum. Unnur Brá Konráðsdóttir taldi rétt að byrja á því að skoða náði þá samninga sem í gildi eru um þingmannanefndina áður en lengra væri haldið í því sambandi og fara að nýju yfir málið á næsta fundi forsætisnefndar í Reykjavík þann 13. maí nk. Þá var ákveðið að Vestnorræna ráðið taki þátt í Arctic Circle-ráðstefnunni í Hörpu í haust og skoði að taka þátt í ráðstefnu Arctic Circle um siglingaleiðir á norðurslóðum sem haldin verður í Alaska í ágúst nk. Loks ákvað nefndin að fylgja eftir beiðni til utanríkisráðherra landanna um að setja á fót vinnuhóp sem kortleggur möguleika og áskoranir við mögulegan vestnorrænan fríverslunarsamning, en sú beiðni var send ráðherrunum 9. mars sl.

Nefnd ráðsins um hugsanlega sameiginlega vestnorræna stefnu á norðurslóðum fundaði í færeyska sendiráðinu í Kaupmannahöfn 25. mars 2015 en markmið nefndarinnar er að draga fram á hvaða sviðum vestnorrænu löndin eiga sameiginlegra hagsmuna að gæta varðandi norðurskautsmál. Af hálfu Íslandsdeildar Vestnorræna ráðsins sótti fundinn Unnur Brá Konráðsdóttir, formaður, og Vigdís Hauksdóttir, varaformaður, auk Vilborgar Ásu Guðjónsdóttur ritara. Niðurstaða fundarins var að vinna frekar að tillögum um vestnorrænt fríverslunarsvæði sem

fæli í sér frjálst flæði vöru, fólks, þjónustu og fjármagns, sem og tillögum um aukið samstarf landanna á sviði samgangna og innviða, sjávarútvegs og orkumála. Hvað samgöngur og innviði varðar var áhersla lögð á flug- og sjósamgöngur, siglingaleiðir, umskipunarhafnir, sameiginlegar reglur fyrir skemmtiferðaskip og styrkingu samgangna milli íbúa vestnorrænu landanna. Á sviði sjávarútvegs var áherslan á aukin viðskipti milli landanna, gerð samnings um veiðar á fleiri fisktegundum á fiskveiðistjórnunarsvæðum landanna þriggja, sameiginlega markaðssetningu á sjávarútvegsafurðum, sameiginlega vestnorræna gæðastaðla, samstarf við hafrannsóknir og samstarf í tengslum við samningaviðræður við Evrópusambandið. Á sviði orkumála var áherslan lögð á útflutningsmöguleika, til að mynda á raforku í gegnum sæstreng, og rannsóknasamstarf. Loks var ákveðið að landsdeildirnar ynnu drög að ályktunum fyrir næsta fund nefndarinnar í Reykjavík 13. maí nk., þ.e. Íslandsdeild um aukið samstarf á sviði samgangna og innviða, Grænlandsdeild um samstarf á sviði sjávarútvegs og færeyska landsdeildin um vestnorrænt fríverslunarsvæði.

Eins og áður sagði fór fundur forsætisnefndar með þingnefnd Evrópuþingsins fram 26. mars 2015. Flugí Íslandsdeildar frá Kaupmannahöfn til Brussel var hins vegar aflýst og því forfölluðust Unnur Brá Konráðsdóttir, formaður, og Vilborg Ása Guðjónsdóttir ritari.

Frekari upplýsingar má nálgast hjá ritara Íslandsdeildar Vestnorræna ráðsins og á vefsvæðinu [www.vestnordisk.is](http://www.vestnordisk.is).